



三具足經優波提舍

元魏天竺三藏法師毗目智仙等譯



清刻龍藏佛說法變相圖

三具足經優波提舍翻譯記

節十

施戒聞三備攝衆行是以如來說名具足法門深邃淺識未窺

天親菩薩慈心開示唯顯經義弗釋章句是

故名爲優波提舍昔出中國今現魏都三藏

節十

法師毗目智仙婆羅門人瞿曇流支愛敬法

人沙門曇林於鄴城內在金華寺興和三年

歲次辛酉月建在戌朔次庚午十三日譯千

百十言

驃騎大將軍開府儀同三司御史中尉勃海

高仲密啓請供養守護流通

三具足經優波提舍

天 親 菩 薩 造

元魏天竺三藏法師毗目智仙等譯

如是我聞一時婆伽婆住毗舍離大林精舍
與大比丘僧大菩薩衆俱爾時世尊告無垢
威德大力士言善男子菩薩有三具足何等
爲三一者施具足二者戒具足三者聞具足
善男子此是菩薩三種具足世尊說已無垢
威德大力士聞心生歡喜又彼比丘彼諸菩
薩聞世尊說皆悉讚歎如是菩薩三種具足
我今解釋以何義故彼無垢勝無量具足勤
進正出相好嚴身過百千日光明世尊而說
是經偈言
無量種具足 出身三界主 第一勝相集
超日光牟尼 何所饒益故 說此修多羅

世尊何故遊毗舍離大林精舍以何義故名
爲世尊何故世尊遊毗舍離大林精舍不於
餘處爲善男子說此菩薩三種具足以何因
緣而說如是三種具足不多不少又復云何
菩薩爲當惟有如是三種具足爲當更有餘
法具足若此說^{節十}三大海慧經云何相避彼說
菩薩四十具足所謂菩薩布施具足乃至菩
薩方便具足彌勒解說修多羅中言善男子
菩薩滿足無量具足更有大乘修多羅中彼
處世尊爲菩薩說無量具足彼云何避又復
聖者龍樹已說偈言

淨道皆具足 餘人不能說 佛無量智慧
故能說具足 佛無邊功德 具足是善根
若如是菩提 有無量具足
若餘處說菩薩則有無量具足此修多羅云

何相避善男子者是種性義何故菩薩名爲種性此義須說以何義故名爲具足施具足者何故名施有幾種施戒具足者何故名戒有幾種戒聞具足者何故名聞有幾種聞又復施戒二具足漏聞具足者則是不漏以何因緣以漏不漏二種具足得一切智不漏之法此義須說又施具足幾種因緣戒聞具足幾種因緣又復世尊說三具足何故初施中戒後聞此意須說以要言之世尊示現云何施具足云何戒具足云何聞具足此皆作難我今解釋何故世尊施戒聞等無量無垢不可稱量布施具足身如虛空住無垢法而說是經彼義今說偈言

第一施戒聞 寂正行苦身 如空勝法持
具足善光明 人天禮牟尼 第一世間覺

無垢除三苦 何義說此經
此義今說發菩提心學菩薩業相應饒益一切智人示現此義菩薩既發菩提心已次滿施等三種具足此菩提業非唯發心而能證得阿耨多羅三藐三菩提偈言

若發菩提心 悲衆生苦惱 彼相應善業
佛說此勝經

又復何義佛說此經爲怯弱者除怯弱故爲彼始行菩薩行者聞修無量種種法故爾乃獲得阿耨多羅三藐三菩提生怯弱心佛知彼意爲除怯弱饒益彼故而說是經言善男子菩薩唯有三種具足世尊示言汝勿怯弱若我廣說過不可數菩薩具足以要言之三具足攝偈言
若有諸佛子 畏經無量劫 怯弱於善法

久遠得菩提 如來自然智 安慰饒益彼
是故第一覺 說此修多羅

又復何義佛說此經菩薩欲得趣一切智第一勝舍須資糧乘及道方便示現此義大導師言若汝欲得趣一切智第一勝舍須道資糧取施具足若須所乘取戒具足知道方便取聞具足示現此義偈言

佛子若欲趣 一切智勝舍 彼人樂相應
道資糧等覺 世尊饒益彼 說此修多羅

又復何義佛說此經菩薩希望境界生智三種具足不解其因覺因饒益世尊已示若汝

欲得境界生智非唯希望汝應修滿三種具足若施具足當得境界若戒具足汝當得生若聞具足汝當得智偈言

菩薩若希望 善微妙境界 欲勝生不劣

第一增上智 示現因饒益 世尊說是經

又復何義佛說此經菩薩欲得過五怖畏不解其因覺因饒益何等爲五一者不活畏二者惡名聞畏三者死畏四者惡道畏五者大衆威德畏世尊已示若汝欲得過五怖畏應當修滿三種具足若施具足離不活畏惡名聞畏若戒具足則離死畏離惡道畏若聞具足則離大衆威德怖畏偈言

第一善逝子 欲離種種畏 智慧人覺示
第一廣勝因 是故牟尼尊 說此修多羅

又復何義佛說此經爲彼疑者斷疑義故彼大衆中有人有天有阿脩羅有龍夜叉鳩槃荼等見聞世尊勝身口意不可思議生如是心不知世尊幾種具足獲得此三不可思議是故世尊爲斷此疑已說是經言善男子菩

薩修行三種具足此已示現世尊往昔發菩提心三具足滿是故得三不可思議偈言

若人天脩羅 龍鵠槃荼等 聞佛勝功德

而不解其因 牟尼斷彼疑 故爲說是經

又復何義佛說此經菩薩生於如來種性法

種性中相應示現世尊已示若人得生婆羅

門姓若刹利姓如是之人法性相應若離法

種是則卑劣彼人若生如來種性不離法性

若生法性如來種性以滿施等三種具足若

不滿足是則卑劣是故如來如是教言汝滿

具足莫後卑劣偈言

若生善逝性 離過大富樂 天人所禮讚

牟尼王令彼 不離自法義 說此無垢經

又復何義佛說此經若人自謂行於大乘第

一堅固是大衆生唯口教言欲護世間一切

衆生學菩薩行修諸功德而無真實彼如是人如說如行相應饒益是故如來爲說此經令彼人知修一切行如來世尊爲彼人說非此菩提唯言語得多種苦行乃得成就我云何得我於往昔爲取菩提一切行智希望利益一切衆生彼彼生處種種苦行及種種舍所謂種種美味飲食種種騎乘坐卧等處園林池水戲樂之處堂舍田業城邑聚落寶莊嚴具冠髻眞珠及毗瑠璃金寶瓔珞衆寶金剛諸莊嚴具白象牛馬水牛輦輦莊嚴之具并及所乘諸牛馬等僮僕導從皆以捨施過去久遠我爾時作一切莊嚴見王身時城邑聚落國土山川海畔大地并及人民一切樹林種種苗稼及諸藥草無量華果鮮淨妙寶種種莊嚴諸粟豆等滿藏財寶布施貧窮又

復本作善牙童子我於爾時所愛妻子捨施
不憝又復往昔作善王時滿宮嫫女有十千
數捨施不憝又復往作寶髻王時直閭浮提
上身寶髻妙莊嚴冠脫施不憝又復往作迦
施王時上身愛分捨施不憝又復往作無怨
勝王捨身耳鼻施而不憝又復往作月光王
時如青蓮華無垢平滿廣長好眼蓮華面上
自手挑施又復往作華德王時白淨無垢猶
如雪皁及君陀華乳色齒鬢挑施不憝又復
往作善面王時廣妙長薄清淨無垢如蓮華
葉口中舌根自手拔施又復往作給求者王
一切世間貧窮乞人憶念我者念彼心喜以
一切珠金等珍寶巧作自身寶手用施又復
往作知足王時以手足施又復往昔曾作光
金閭浮提王捨手足指以用布施又復往昔

作求善語大富王時以愛法故用手足爪挑
自身肉捨以布施又復往昔作示一切饒益
王子自捨身血給與病人又復往作利益仙
王割肉截足捨以布施又復往作居素摩王
童子之時破自身骨髓布施又復往昔作
尼羅拏童子之時捨心布施又復往作降惡
王時捨大小腸乳肚肝肺胞腎胃膽脾脂頭
腦以用布施又復往作淨藏王時捨自身皮
以用布施又復往作金脇鹿王捨身皮施又
復往作光明王時一切身分分捨施又復
往作成就一切饒益導主一切愛物皆悉捨
施臨被殺者復捨自身而救濟之又復往昔
身作僕使捨身供給一切衆生又復往昔作
求善語大富王時高千肘山在上捨身投大
火聚爲善說句法因緣故又復往作一切施

王盡割身肉秤用施與爲救怖畏來歸我者
又復往作不憚王時於彼殺者自捨已身救
護饒益又復往作大悲長者若入城內獄中
繫者放令得脫又復往昔作象王時自身作
橋度諸衆生又復往作魚龜瞿陀受一切苦
自身忍耐又復往作師子鹿王不惜筋脉拔
濟大衆不護自身救怨家命又復往作悲心
仙時然自身臂失道衆生作明示道又復往
作說忍仙時嚮嚮割我我救彼怨又復往作
不休息堅等住菩薩他入我舍侵我妻婦有
自在力能忍不瞋又復往作羆身時畏失命
人來至我所我皆安慰自捨愛身又復往昔
作上仙時心愛正法以正法儉無法渴法愛
正法故破身取皮取血取骨書寫法言又復
往作者王童子爲病人故自捨已命與作第

一難得之藥而施與之又復往作勝福德王
於破亂世財物傾盡近怨家所自縛已身以
利益他饒益安樂又復往作摩那婆時在深
山中見有餓虎睡寤飢急自捨已身施令飽
滿又復往作精進比丘發勤精進一切智智
求相應行衆生淳熟護正法故一切苦惱種
種欺陵能忍不瞋又復往昔作堅甲時一正
遍知正像法中勤苦持戒如是八萬四千之
身如是阿僧祇那由他百千苦惱我皆作來
我以希求一切智智爲欲利益一切衆生然
我不曾退菩提心不墮大乘不捨本願不緩
大甲於菩薩業不生怯弱不曾捨離檀波羅
蜜不曾捨離尸波羅蜜不曾退墮羣提波羅
蜜不曾破壞毗梨耶波羅蜜不曾放捨禪波
羅蜜不疲倦修般若波羅蜜不捨攝法修行

一切菩薩之道具足清淨不錯不謬堅住一切菩薩之地不倦一切菩薩三昧三摩跋提教諸衆生發菩提心不生疲倦聚集一切菩提分法非不得恩發行一切菩薩之行堅住不退心當欲滿一切菩薩諸願法門不生畏

懼聚集修行一切功德不生怯弱何以故一切世間最勝之處一切所有學與無學辟支佛智所不能證所不能入不能觀察此佛法名彼不易得若小功德和集修行則不能得小善根者不能得故如是若人有此宗願我

節十

九

當成佛是故翹勤修行精進如功德法聚集修行我於此處希望欲得如是義故佛說此經以何義故名世尊者彼義今說言世尊者供養義故復有餘義如菩提心優波提舍彼說應知

何故世尊遊毗舍離大林精舍不餘處者彼義今說如是難者則不相應隨在何處彼一切處皆有此難若在餘處不離此難更有餘義如菩提心優波提舍彼說應知

以何因緣而說如是三種具足不多少者彼義今說以有三分相對義故以此三種對治貪嫉破戒愚癡以施具足對治貪嫉以戒具足對治破戒以聞具足對治愚癡又貪瞋癡以三對治以施具足對治貪心以戒具足對治瞋心以聞具足對治癡心又復示現三種福德施具足者示施福德戒具足者正行福德聞具足者示修福德又復有義一切衆生隨順淳熟施戒具足一切衆生既淳熟已然後能聞聞已觀察相應淳熟如是隨順一切衆生淳熟相應是故說三又復有義二種具

足一切佛法聚集住處得不亂法依止不亂
則聞具足如法正覺一切佛法皆具足得如
是一切佛法聚集住處如是因緣是故說三
爲當唯有三種具足爲當更有餘法具足彼
義今說如是三種總攝具足若佛廣說無量
具足皆此中攝若大海慧修多羅中彼言世
尊菩薩所有一切具足福德具足智具足攝
應如是知何以故世尊菩薩若修福德具足
以是因緣尊勝富貴復能令他尊勝富貴智
具足故口說善語一切衆生聞者歡喜彼施
與戒福德具足聞智具足如是無違何故菩
薩名種姓者彼義今說有師說言有四種家
如來生處如偈說言

諦捨寂靜慧 此四眞勝家 正徧知家生
師說言種姓

又善方便是菩薩父般若波羅蜜是菩薩母
如彼無垢名稱經說般若菩薩母方便以爲
父一切衆導師無不由是生菩薩般若波羅
蜜者持故如母方便生者如父生子如父母
故說言種姓如是種性父母二種相似義故
又奢摩他毗婆舍那如是種性生正徧知一
切性中此門第一一切善法是性是門如經
中說佛正法中二法雙行彼奢摩他父毗婆
舍那母彼二法種性偈言

毗婆舍那母 奢摩他爲父 生一切菩薩
因毗婆舍那 奢摩他等故 有一切正覺
又復有義諸佛菩薩現前正住三昧大悲此
二法是如來種性因此二法生於如來諸佛
菩薩現前正住三昧爲父大悲爲母又復如
是此佛菩薩現前正住三昧爲父忍菩薩母

此是種性偈言

佛菩薩現前 正住三昧父 若大悲戒忍
是菩薩之母

此偈明何義說菩薩種性之義

以何義故名具足者彼義今說推覓衆物處
處將來舉掌積聚計校備辦增益和集故名
具足又復多法和集之義故名具足又復有
義荷擔菩提故名具足如外道齋大會具足
初取羊等將來營辦如是菩提如前具足後
菩提覺又復多法說名具足如藥和集乃得
成散如是具足又復有義前種性法堅持不
失復向彼岸如大船舶先和集已後向寶洲
又復有義正負非邪如觀察耳如是之義故
名具足又復常修一切勝行故名具足又具
足者欲得出過荷負重擔出到度義荷負重

擔不懈怠義三界過義故名具足

又具足者平等集修平等負修平等行修平
等起修平等作修平等持修平等住修平等
養修故名具足平等養修者於諸衆生猶如
醫師消息病者療治衆病等負修者六波羅
蜜如乘船舶等行修者如大乘說等起修者
菩薩修學如學射等先正足住等作修者巧
作一切菩薩諸業如巧作師等持修者常無
常等如秤平等住修者一切菩薩能住法
舍如堂廡柱等集修者一切白法如蜜蜂集
如是等義故名具足

又自由義若和合義若或多義若別異義若
或廣義若寬博義若或勝義若堅固義若牢
固義若和集義若和合義若或物義若或財
義若或取義若積聚義若或束義若或媿義

第十

十二

故名具足

何故名施彼義今說若破貪貪得大富樂福德具足是故名施施有幾種彼義今說略有三種何等爲三一者資生施二者無畏施三者法施資生施者謂飲食等種種捨施彼資生施色香味勝淨潔如法遠離貪垢無匱悵垢離貪垢者心不匱小如是捨施自手多施無悵垢者不存富樂如是捨施無畏施者謂能救濟師子虎龜王賊水等如是諸畏何者法施倒說法者爲之正說次第學句教彼正取廣說則有無量種種聖無盡意說不可量菩薩施業所謂菩薩須食與食即是布施一切衆生色力壽命安樂辯才

又菩薩施心濁等過皆悉遠離彼濁心施有十四種一者心濁二者先妬三者嫉心四者

慢心五者不減慢六者瞋心七者揀擇八者疑心九者惱害十者亂心十一者名十二者依准上法選日時等次第行施十三者懈怠十四者先爲報力如是等法能涂心故名爲濁心心體有濁故名爲濁先妬施者得富樂少眷屬不愛先嫉施者雖得富樂不樂勝報唯喜下劣坐卧牀敷止宿等處食飲富樂貪著不離先慢施者雖得富樂生下劣姓心不正直先不減慢而布施者後受報時依他得活如事王人技兒使卒誑惑之人防邏戍護種種驅使平准市官當門守戶放牧畜獸承事太子下賤官人恐嚇他等博戲等人掬力相撲如是種種廣設方便強力取物復有勇躍劫賊之人如是等業以自利益先瞋施者後得大力畜生等身師子虎豹蛇蟒熊羆獾

等中生揀擇施者後得報時治生田業作子
林子若種林人作林等人得少果報以自存
活先疑施者後得果報富樂不常先惱施者
雖得富樂生夷人中若隘陋處若災孽地邊
地生等亂心施者得富樂少或不得果先名
施者雖得富樂得財富已而復喜失依准上
法選日時等次第施者雖受富樂勤苦難得
懈怠施者後受富樂雖得不常先爲報施後
雖得報難得而少如是初過菩薩如是皆悉
觀察既觀察已自心清淨淨心生已遠離濁
心離濁心已正信相應悲等功德相應和合
自手施與先信布施得好方處種性力色受
勝富樂眷屬自在名聞辯才安樂色命他不
欺陵爲人讚歎第一自在勝坐卧處止宿等
處堂舍莊嚴飲食衣服塗香衆香色聲味觸

得如是等富樂住處

何故名戒彼義今說若能寂靜非法律儀惡
不善法能生善道能得三昧如是名戒戒有
幾種彼義今說略有三種謂律儀戒攝善法
戒攝衆生戒彼所謂戒律儀戒者菩薩正取
七種律儀所謂比丘比丘尼式又摩那沙彌
沙彌尼優婆塞優婆夷戒出家在家如是次
第皆律儀攝

節十

十四

何者菩薩攝善法戒菩薩所有善法及戒皆
正取已然後修集大菩提善若身若口若意
等善如是略說攝善法戒又復菩薩何所依
止依戒住戒然後修聞次修思惟後奢摩他
毗婆舍那專一樂行如尊長前正面言語先
禮拜已後起合掌時時常爾如是時時如是
專長敬重供給常於病者悲心供給若聞善

語讚言善哉於功德人說實功德生如是心
普爲十方如彼十方一切衆生一切福德勤
心隨喜喜心生已然後口說於他一切犯觸
已者皆能忍受一切所修身口意善皆悉願
取阿耨多羅三藐三菩提時時種種供養三

寶一切種種設供養已口發正願相應精進
常護善分身不放逸口誦學句意念發行藏
護根門食唯知足初夜後夜寐寤相應親近
善人依善知識自識已錯犯過識知見已知
改犯佛菩薩諸福德人盡心懺悔如是等分
攝取善法得善法已守護增長若如是戒是
名菩薩攝善法戒

第十

十五

何者菩薩攝衆生戒彼要略說有十一種此
義應知何等十一一者種種饒益衆生種種
因緣同事相應二者衆生病不病等種種諸

苦供給伴等三者世間出世間義如彼法說
先示方便先示道理四者報衆生恩不忘恩
報隨所宜護隨報供給五者師子虎王水火
賊等種種畏處護諸衆生六者諸親善友亡
失富樂憂悲殃罪能爲除遣七者貧窮苦惱
乞匄衆生一切所須皆悉給與行善之人依
正捨法功德攝取八者先語問訊後語問訊
應時而往九者若他呼喚取食飲等世間饒
益彼此往來以要言之一切所有不饒益事
不可愛行皆悉捨離心隨順轉十者自實功
德心生歡喜公白正取畢竟唱說以潤益心
若治若擯若罰若黜或時驅遣諸如是等不
善處擯令住善處相應饒益十一者以神通
力示地獄等毀些不善令是佛法教化衆生
令其歡喜得未曾有又復聖者無盡意說六

十七種謂於一切諸衆生所不起惱害如是等故又菩薩藏修多羅中廣說無量如來戒故又復此戒無量無邊功德和集如是功德今說少分所謂戒名出家人戒如大富人身少喜樂於善法中增長如母於惡法中能護如父如在俗人有財物故一切饒益皆悉成就出家人戒亦復如是正導如是如人正行則無衰損如善人所報恩具足如世間人愛惜身命又如勝智世所讚歎如順王語求解脫人護戒亦爾欲求解脫當歸依佛欲生善道當歸依戒安身之本戒是第一知識遇惡善友不捨戒亦如是欲自利益至死不捨如汝慙愧世人莊嚴如人勝行不諂爲最如梵行中見柔和勝如欲大貴不幻爲本如不放逸多饒功德欲證勝法依觀察得如近善友

第十

十六

初中後時希望學人時節如海不可得過如諸衆生依地而住依戒住持一切勝法如水能潤一切種子戒能津潤善法種子如火成根如風能令分分開張如行住物空爲無障欲證果人戒如堅瓶戒如寶藏如隨所欲聲得之牛如食資糧如人因杖得行住等如息依命如命慧勝如國有王人所依止如軍有勇將功德軍衆戒是統將如婦女人一切樂行皆因夫主如行道人所所有資糧若行天道戒是資糧如曠野行主將善導行善法者戒是前導如大海船若人方便度生死海以戒爲船如病人藥煩惱病者戒爲良藥如戰鬪處所有器仗共魔王戰以戒遮防如潤親有不可得捨戒是賢聖如大闇中燈爲照明未來大闇以戒爲燈如過度河等因橋而度出

第十

十七

三惡道諸方便中戒最爲大如清涼舍能離
大熱煩惱大熱戒能清涼如怖畏者歸依健
兒執刀仗者畏惡道人戒是歸依菩薩之人
如住實家善凡夫人如自己物菩薩之人如
住捨家行道之人如所行道菩薩之人如住
家家得果之人能爲他說菩薩之人如住慧
家不動之人平坦清淨如諂捨直如貪捨施
如嫉心人捨不嫉心如幻僞人心不觀察如
沉審人捨離高心如謹慎人捨放逸過如王
有眼無明闇人非其境界八聖道分解脫相
應不觀察人去之甚遠如阿羅漢愛涅槃法
如人自愛如佛出世次第善轉如住正法則
住果證如佛世尊利益自他如僕事主物時
方處皆須相應如人獲得須陀洹果則心安
隱如得良時造作不悔如菩薩願終得解脫

如良善田種善種子生長廣收如時方財因
緣具足智色愛樂自多受用如善根熟則有
勢力如自善行自心歡喜如人無罪此世來
世則無所畏如勇健人所依正行戒如正行
善喜自修如修慈者善心安樂如修喜者心
常慶悅如修悲者心則正信如修捨者心常
隨順四種正法如實諦信如世間法障礙寂
靜隨順樂行如因聞故則得辯才如巧語人
則無所畏如智明人則有名稱如善語人不
可破壞如法隨法能成就證得明解脫正覺
之人正道如幢如有智人則能修禪如伴修
道如健因緣則無所畏如山饒寶饒功德寶
如海住處多饒希有如來弟子戒如大海是
入道行如信得果如覺知者依道理行雖曰
無水猶能洗浴無根莖葉而生香物不穿不

瑩非金非寶非是真珠而是莊嚴雖非境界而能生於後世樂報世間人天脩羅魔梵一切沙門婆羅門等之所讚歎非因他樂是得天道涅槃方便如濟不邪無有泥溺離石礪石如是可度度信河濟如財物等離種種過如離過道資糧柴薪水及水泉正直不迴不高不下惡蟲蛇蠍青蠅蚊子寒熱賊等惡物離道如不須犁不種不熟饒種種田雖無種樹無藥無林而得美果味如甘露不在高原不下濕生非餘人作又無人取常新華鬘不乾不燥如善冷水淋灌却熱雖不防護不器仗鬪不與財物不令怖畏而得樂具常得富樂離諍鬪處如大寶山價直無量不出於海過大衆畏命畏罰畏不活畏惡道等畏如影隨身此世後世常與身俱此如是等種種功

德戒相應故

何故名聞彼義今說謂不善法寂靜相應若不能爾則非義語修多羅等十二部經言語說法是故名聞聖者無盡意說八十種謂欲修行順心行等

節十

十九

以何義故漏與不漏二種具足得一切智不漏法者彼義今說智慧觀察唯一味故如蜜蜂王譬如蜂王種種異物皆作一味菩薩亦爾漏與不漏二種具足以智慧力皆爲一味又願方便令漏不漏二種具足得一切智不漏之法如寶積經佛言迦葉譬如諸方四維等處所有大河井及眷屬一切水聚入大海已彼一切水平等一味所謂鹹味如是迦葉菩薩如是以種種門集諸善根願菩提故一切一味所謂皆是一切智味

施戒聞等幾因緣者彼義今說施具足者二種因緣一離貧窮二得大富戒具足者二種因緣一離惡道二生善道聞具足者二種因緣謂離愚癡得大智慧

又復菩薩三種具足自他利益施攝衆生攝衆生已令住戒聞如是具足他利益行自利成就阿耨多羅三藐三菩提如是具足自利益行

說三具足何故初施中戒後聞彼義今說依漸次義示現佛法如彼大海譬如大海次第漸深佛法亦爾初說布施中戒後聞又復有義在家菩薩食等施已彼後時聞出家功德聞已深信捨家出家既出家已方得淨戒以住戒故離世間業得無上聞是故在後說聞具足又復有義上生次第菩薩最初自他饒

益是故行施彼布施已次行何者如是思惟世尊說戒及持戒人復有何者次第相應此則說聞以要言之施具足者世尊示現檀波羅蜜戒具足者尸波羅蜜聞具足者忍進禪慧波羅蜜示又復有義施戒示現福德具足聞智具足又復有義施戒具足示障礙道聞具足者示無礙道

三具足經優波提舍

音釋

胞匹交切與腎時忍切脾頻彌切肘陟
切同水府也筋筋舉欣切脉骨絡也鬻力充切塊切
翹祈堯切船白旁陌切角古岳切獲居縛切
隘企也隘隘胡夾切孽魚傑切黠尺律切聲古

乳切取午
也 礪
居良切
礪石也
蠍許竭切
毒蟲也